

VJERSKI TURIZAM

Bosna i Hercegovina je zahvaljujući svojoj bogatoj historiji već vjekovima mjesto susreta i suživota različitih naroda što je doprinijelo stvaranju jedinstvenog prostora u kojem zajednički žive različite religije.

Sarajevo, glavni grad Bosne i Hercegovine je zbog svoje vjerske raznolikosti poznat kao „evropski Jeruzalem“. Sarajevo je sjedište muslimanskog vjerskog poglavara, Reisu-l-uleme, dabrobosanske Mitropolije pravoslavne crkve i sjedište Vrhbosanske nadbiskupije Rimokatoličke crkve u Bosni i Hercegovini. Najznačajniji vjerski objekti u Sarajevu se nalaze u centru grada na razdaljini od nekoliko stotina metara - Gazi Husrev-begova džamija, pravoslavna Saborna crkva, katolička katedrala Srca Isusova, kao i Sarajevska sinagoga.

Najposjećenije svetište, odnosno najatraktivnija destinacija u oblasti vjerskog turizma na tlu Bosne i Hercegovine je **Međugorje** – mjesto Gospina ukazanja koje se nalazi 25 km od Mostara. Ovo mjesto od 1981. godine, kada je grupa mladih posvjedočila o Gospinom ukazanju, posjećuje najmanje milion hodočasnika tokom godine. Mjesto prvih Gospinih ukazanja – Brdo Ukazanja se nalazi nekoliko stotina metara iznad bijakovićkog zaseoka Podbrdo.

Osim Međugorja, najatraktivnija destinacija na bosanskohercegovačkoj mapi vjerskog turizma je **Ajvatovica** - najveće dovište muslimana u Evropi na kojem se već 500 godina okupljaju vjernici. Ajvatovica se nalazi u Pruscu, mjestu između Bugojna i Donjeg Vakufa. Za Ajvatovicu se veže legenda o mističnom događaju iz života Ajvaz- dede koji je u Bosnu i Hercegovinu došao u 15. vijeku. Početak okupljanja je određen svakog sedmog ponedjeljka po Jurjevu, a ne prema hidžretskom kalendaru, što upućuje na povezanost sa bogumilskim molitvama za kišu i zaštitu usjeva.

Tekija na vrelu Bune u Blagaju osnovana je nakon pada Hercegovine pod tursku vlast u 15. vijeku i predstavlja mjesto gdje derviši posebnim ritualom obavljaju - zikir - slavljenje Boga. Tekija je sagrađena u blizini vrela rijeke Bune, najjačeg kraškog izvora na teritoriju **Evrope** sa prosječnim godišnjim protokom vode od 43 m³ u sekundi. U Tekiji se jednom sedmično priređuju derviški obredi slavljenja Boga, a svake godine u maju mjesecu se organizuje vjerska manifestacija mevluda kojoj prisustvuje više hiljada posjetitelja.

Jedan od najznačajnijih manastira Srpske pravoslavne crkve je **Manastir Tvrdoš** posvećen Uspeniju Presvete Bogorodice i sjedište hercegovačkog episkopa i mitropolita,. Manastir se nalazi nedaleko od Trebinja. Za manastir Tvrdoš se vežu tri različite verzije nastanka. Prema prvom predanju osnovali su ga sveti car Konstantin i njegova majka Jelena, prema drugom, kralj Milutin, a prema trećem predanju manastir je sagradio Herceg Stjepan Vukčić Kosača. Monasi manastira Tvrdoš proizvode vino i med vrhunskog kvaliteta.

Jedna od nezaobilaznih destinacija vjerskog turizma u Bosni i Hercegovini je i **Manastir Žitomislić** posvećen Blagovještenju Presvete Bogorodice koji se nalazi blizu Mostara, između Počitelja i Bune. Manastir Žitomislić predstavlja i kulturno značajan pravoslavni manastir Hercegovine iz 16. vijeka. Samostan je srušen togom proteklog rata i danas je ponovo obnovljen.